

De Taafpath nie gekennt

Ich han aa e Taafpath. De Satz han ich schun hunnerti Mol in Gedanke wiederholt. For was? Weil ich ohne de Path getaaft gin sin un ne noch nie im Lewe gsiehn han. Un aach nit weeiß, wu er heizutach wohnt, ob er iwerhaupscht noch am Lewe is.

Des is e langi Gschicht. Mei Taafpath heescht Hansi Dian. Er is 1928 in Bogarosch uf die Welt kumm. Wie er drei Jahr alt war, sin sei Eltre uf Amerika arweite gang. De Hansi is bei de Großeltre mitnaner mit meine Mutter, sie ware Gschwisterkiner, ufgewachst. Sie sin mitnaner in die Obeda gang un ware wie Gschwister. Mei Mutter hat oft verzählt, dass em Hansi sei Mutter noh zwaa Jahr uf Bsuch kumm is. Zu Oschtre. Mitgebrung hat se e riesiches Oschteraj aus Tschokoladi. In eem Kerwl, so groß war des Aij. Un dernoh war se wieder fort, em Hansi sei Mutter. Doch noh nochmol eem Jahr, de Hansi war inzwische sechs Jahr alt, is sei Mutter wieder kumm. Sie hat de Hansi mitghol uf Amerika, der hat jetz bal in die Schul gehn misse. Un de alde Ota is mitgfahr bis uf Konstanza zum Schiff. De Hansi hat Rutz un Wasser gebrillt. Er hat natierlich nit mit dem "fremde Weib" in die großi Welt fahre wille.

Die Johre sin ins Land gezoo, de Hansi hat deitsch rede vergesst, er hat in Philadelphia gheirat un is es reicher Mann gin. Hie un do is de Großeltre in Bogarosch e Brief ins Haus gflattert. Manchmol is zu Oschtre oder Weihnachte aa e Paket kumm. Drin ware allerhand Leckerbisse un Gwand for die Großeltre. Des war's dann aa schun. Aus de Aue, ausm Sinn!

Wie ich uf die Welt kumm sin, hat mich mei Goth, die Schwester vun meim Vater, leenich getaaft. De Hansi war als Path ingetraa in de Taafschein, mei Mutter hat ke Gschwister ghat. Een enziches Mol han ich e Handuhr kriet vun meim Taafpath. Wahrscheinlich hat er selmols Geld geschickt, un mei Leit han mer die Uhr kauft. Des war im Jahr 1964. Die Uhr han ich aach heit noch. Sie geht zwar nimi, doch es is es enzichi Gschenk vun meim Taafpath. Ich weeiß nitemol, ob de Hansi noch lebt. Er misst jo die 75 Jahr schun längscht iwerschritt han, doch des is doch ke Alter! Iwerhaupscht nit in Amerika!

Un wie des heizutach mit dere Technik is, han ich zufällig e E-Mailadress vun eem Weib aus Philadelphia uner die Fingre kriet. Ich han des Weib angschrieb un em verzählt, dass ich schun johrelang mei Path suche tu. Es sin nor phaar Täch vergang un ich han die Mailadress vun eem Johann Dian kriet. Do war ich awer froh, han mich gleich an de Computer gsitzt un alles gschrieb, was ich so gewisst han, natierlich in englisch. Un es is aa Antwort kumm. Der Mann war e Gschwisterkind vun meim Path, mit demselwe Name un Vorname, awer freind vun der anri Verwandschaftsseite aus. Un er hat mer gschrieb, dass mei Taafpath leider schun mit 70 Jahr gstorb is. Un er hat mich mit seiner Tochter, des wu jo mei Gschwisterengel is, in Verbindung gsetzt. Hie un do krien ich e Nachricht, jedesmol aus eener anri Stadt. Weil des Donna is e „Bisnissfrau“, also e Geschäftsfrau un hat vill um de Kopp rum. Un do hats sicher ke Zeit, an sei Verwandschaft im Banat zu denke!